

Korɛnte Shɛɛn **Tudunmɔɔ Pɔli ya sɛmɛ shuun wo** **wemu tun Korɛnte shɛɛn mu ge**

Jagɔ ye mu we sɛmɛ we d'a tun wɛ?

Pɔli ya sɛmɛ nizhiime wemu tun Korɛnte shɛɛn pu mu ge, Timote w'a kari ni wu ni. A Wee di guri pa ni fiin pa ni, na yiri egilizi wu yiri pemu ya Pɔli yatɛnyɛ gbo ge, a lee di Pɔli pye w'a sɛmɛ wa bɛ ka na tun pu mu (2 Korɛnte Shɛɛn 2:3,9; 7:8). A w'i wee sɛmɛ wu kan Tite mu w'a kari, a wee di shɛ ba ni fiin nizaama ni. Ga, a w'i ba waha wa bɛ kaa jo sanha Pɔli mu. Lee wuu na Pɔli ya we sɛmɛ we ka.

We sɛmɛ we kakana juna

Pɔli ya wuyɛ cɛɛɛɛ, na pusamaa durogo. Taanɛɛɛɛ kemu ki jɛ wu ni na jaha tii Korɛnte shɛɛn na ge, w'a kee shɛ pu na. Pu kaa ya dan wu ni ba wu nagoo jɛ wɛ. Kafinejuu piimu ya puyɛ faanna na Kile tudunmɔɔ pee jɛ ge, Pɔli ya pee kaa taga pu kaala. W'a li shɛ na wee na ba shɛ foro pu na wu tɔɔnii taanri wuu ni (2 Korɛnte Shɛɛn 12:14), na li shɛ pu na na pu kaa ya waha wee Pɔli mu, ali na toro pu kenɛ yanmuyɔ yi bɛɛri tɔan (2 Korɛnte Shɛɛn 12:14; 13:1).

Sɛmɛ wu kafila jugbɔyɔ

2 Korɛnte Shɛɛn 1—7 Pɔli ya baraga taha Kile na wu saama pu wuu na. Lee kadugo na a wu jo wuyɛ pyaa jaarigana ni wu labye wu shizhaa na.

2 Korente Sheen 8—9 Dεge wemu w'a byi na jahaa tii la baa fεε pu na Zheruzalemu ni ge, Pɔli ya ya jo wee shizhaa na.

2 Korente Sheen 10—13 Pɔli ya wu Kile tuduro ti wo labye wu fiin yu, na wu taanna ni pii pu tudunmɔɔ pu wo wu ni, piimu p'a puyε faanna na Kile tudunmɔɔ pee jε ge.

Pɔli ni Timote fɔ mujuu

¹ Nε Pɔli wemu w'a pye Yesu Kirisa wo tudunmɔ Kile wo jidaan wu funɲɔ ni ge, nε ni na ceborona Timote ni, wèe p'a we sεmε we tun yee mu; yee piimu pu jε Kile wo sipyii Korente kulo li ni ge, ni yee piimu bεeri pu jε fεfεεε wuu Akayi fiige ki bεeri ni ge.

Wèe ya yi shaari: ² Wù To Kile ni wù Kafɔɔ Yesu Kirisa wu niime ni japijε kan yi mu.

Pɔli ya fɔ kan Kile mu

³ W'à wù Kafɔɔ Yesu Kirisa wo To Kile wu sɔni. Wee wu jε jijaara fɔɔ Kile, ni lojinε kanvɔɔ keree bεeri ni. ⁴ Wee w'a lojinε kaan wèe mu wù kanhama keree ki bεeri ni, kɔnhɔ wèe bε di já w'à wù sipyijii logoo jinjεε pu kanhama keree tuun ni, ni lee lojinε le ni, w'à lemu ta Kile mu ge. ⁵ Ba Kirisa wo kanhama pe tuugo nijεhemε ya nɔni wèe na wε, mu Kile ya lojinε kaan wèe mu na jεhεɲi Kirisa baraga ni. ⁶ Kanhama ba nɔni wèe na, lee na bye kaɲɲɔ na lojinε kan yee mu, kɔnhɔ y'i já pa shɔ. Wèe bu lojinε ta, lee na bye kaɲɲɔ na lojinε kan yee bε mu, kanhama pemu ni wèe jε ge, kɔnhɔ y'i loxulo ta yi bε di já pee kanhama pu tuugo xu yiyε ni. ⁷ Wèe fungɔnyɔ yi d'a tiin yee shizhaa na fo

xuuni do. Bani wèe ya li cε jo ba yee wa yi tahaa taa wèe wo kanhama pu ni wε, mu y'a da ba yi tahaa ta lojinε li bε ni.

⁸ Na cebooloo, wèe ya kanhama pemu ja Azi fiige ki ni ge, wèe funḡo ki wa y'i pee cε. Pee kanhama p'a bi sii pεε wèe na fo na she doro wù fanhaya ḡuḡo kana bε tàan, ali fo na she wù pye wù ya daa bε nige nago kanna wù na niifεεε pye sanha wε. ⁹ Wèe kunni bi sii li yaha jo wèe da xhuu. Ga lee ya pye mu, kḡnhḡ wèe ganha ba wùye pyaa kii pyi wù tadanja wε, fo Kilε, wee wemu w'a xuu ḡeni na yeege xu ni ge. ¹⁰ Wee Kilε w'a wèe shḡ ke xu tuugo ke na, wee shiin wu da da wèe ḡuḡo wo. W'a pye wèe tadanja, wu na ba wù ḡuḡo wolo sanha. ¹¹ Yee bε p'a wèe tεge ni Kilε-ḡεεge ni. Lee wuu na Kilε ya niime wemu kan wèe mu yee wo ḡεεge ki baraga ni ge, kḡnhḡ lee di bye kaḡuḡo sipyijεhεmεε bε di baraga taha Kilε na wèe wuu na.

Pɔli ya ḡeri le wu ḡara li keree ki ni

¹² Wèe na já kaa lemu kaa taga wùye pεε ge, lee li wa mε. Wèe zɔɔ pu wa lee wo sεεεε na jo tifire ni see wemu w'a foro Kilε ni ge, tee tifire te wo ḡaarigana, ni wee see we wo ḡaarigana na wèe ya ḡaari koḡo ke na, na la fara bε yeε lee na yee mu. Ga Kilε wo niime wu baraga ni wèe ya lee pye, wèe ya ta tee fungḡḡo fεεε te ta sipya mu wε. ¹³ Wèe di wa yatii bε kani wù sεmεε pu ni na durni yi mu wε, yemu yi da já galaa y'i yi ḡaha cε ge, fo yee ye. Ne dà bε li na jo yi na ba yi bεeri ḡaha cε xuuni, ¹⁴ ma na jo ba yi wa yi ḡaha cε mε dḡoni wε, na jo Kafḡo Yesu cabaḡa yee keree na ba wèe ḡuḡo yirige, ba wèe bε wogoo da ba yee ḡuḡo yirige mε wε.

15 Kee tadaŋa ke funŋo ni ne bi li ŋo wolo jo di fenhε zhe yee yiri, kɔnhɔ y'i kuduun tεhεε shuun ta. 16 Bani ne bi giin di doro yee yiri, di na zhe doro da gaanji Masedɔni fiige ki ni. Di ba she yiri Masedɔni ni sanha, di guri doro yi yiri, kɔnhɔ y'i ba na tεge di she Zhude fiige ki ni. 17 Ayiwa, ne na kee funŋo ke yaha naye mu, di ba lee kushεε le pye mu, lee wa li sheε na li bye ne see ni-i ge? Kelee keree kiimu ŋo ne wo ge, ne ki ŋo wo na sahanji ni koŋo sipyii wo keree ŋo wuugana ni ge? Ma na jo ba di da ba «Uun» jo kaa na, na nɔhɔ jo sanha «Ahayi» lee kanunɔ le na we. 18 Ma na jo ba Kile ŋe me ŋomεε fɔɔ-i de, jomɔ pemu wεe ya yu yee mu ge, pee be ya pye «Uun» na nɔhɔ pye «Ahayi» we.

19 Bani Kile Ja Yesu Kirisa wemu kaa wεe ya jo yee mu ge, ne ni Siliven,* ni Timote ni ge, wee ya «Uun» yu jomɔ na, wu nɔhɔ kuri jo «Ahayi» pee ninumɔ na we. Ga, wu bu yemu jo, yee yi wa. 20 Kile ya ŋomεhεε kiimu lɔ ge, ki beeri ya pye «Uun» Kirisa ni. Lee wuu na wεe ya «Amiina» yu wu mege ki baraga ni, na Kile sɔni. 21 Wee Kile ye pyaa k'a wεe ni yee wo baraga ki pele Kirisa wo kariŋεεge ki ni, na wεe keme yaha wu ye wuyε mu. 22 W'a wu fe pu kpɔn wεe na, na Fεfεεε Munaa li be kan wu mu l'a tiin wu zɔlɔ pu na. Yanmuyɔ yemu wo ŋomεε w'a lɔ wu mu cabaya na ge, a lee di nakaara wolo yee wo da ni.

23 Kile wa na seeri di bu kafineye jo! Yeeye pyaa wo ŋiŋaara na ne pye ne she nige yee yiri Korente kulo li ni we. 24 Ga lee di wa nago kanna wεe pu wa yee wo ŋunɔfεε n'a daa wu shizhaa na-ε de! Bani

* **1:19 Siliven:** Wee ninumɔ pu wa byi na Silasi.

yee ya lowagaa ta na xɔ n'a daa wu ni. Ga wèe ya kapyenεε pyi ni yee ni, kɔnhɔ y'i fundanga ta.

2

¹ Lee wuu na nε li kɔn na funɲɔ ni jo di ganha bu she nige yi yiri, la li she fara yi wo zɔ mεsuu li na wε. ² Bani nε bu zɔ mεsuu wá yee na, jɔgɔ yε pu da já nε funɲɔ taan yee kadugo na wε, yee piimu na nε zɔ mεsuu li wá ge? ³ Lee wuu na nε bi sεmε wa ka, na wee tun yi mu, kɔnhɔ di ganha bu da zhe yi yiri di zhe na zɔ wu mεε kasulo ta wà yee mu wε, yee piimu p'a yaa pu na funɲɔ taan ge. Nε dà li na jo kaa le li jε nε wo fundanga kaa ge, lee li jε yee bεeri bε wo fundanga kaa. ⁴ Nε zɔ mεsuu wo w'a bi wee sεmε we ka ni yama ni na funɲɔ ni, ni jεsinmε bε ni na jaha ni. Nε ta lee pye kɔnhɔ di yee jahaya tanha wε dε! Ga nε lee pye, yee kaa ya dan nε ni taangana lemu na ge, kɔnhɔ y'i lee cε.

Yi yafa nahama pu pyevɔɔ wu mu

⁵ Wa bu kaa pye lemu ya nε jaha tanha ge, wu ya ta nε yε nigin jaha tanha wε, yee bεeri jahaya w'a tanha. Ga nε funɲɔ wa li waha fo li she doro li tayerege tãan wε, lee wuu na nε yee jo. ⁶ Jaagi wemu yee nijehεmεε ya shan na xɔ we ná we na ge, wee na yaa ni wu ni. ⁷ Nimε kunni, y'a yaa yi yafa wu mu, y'i samɔhɔɔ le wu ni sanha, kɔnhɔ zɔ mεsuu li ganha ba bεle doro wu na, fo di wu pye tadanɔ baa wε. ⁸ Lee wuu na nε yi jεeri jo y'a li sheε wu na, na wu kaa ya dan yi ni. ⁹ Lemu bε na sanha nε sεmε wu ka na tun yee mu ge, lee li wa mε. Nε yee taanna wii, yee bu da yee na nε jɔmεε coni keree bεeri ni. ¹⁰ Yee bu kaa la yafa sipya wa

mu, nε bε na lee yafa weefɔɔ mu. Nε bu da nε yaa nε wu kaa la yafa sipya wa mu, yee wuu na nε ma li yafa wufɔɔ mu, Kirisa jii na, ¹¹ kɔnhɔ Shitaanni ganha bu da se ta wù na wε, bani w'à wu fungɔngɔ ki cε na xɔ.

Kaa lemu l'a funzhaga wá Pɔli na Torowasi ni ge

¹² Ayiwa, ba nε nɔ Torowasi kulo li ni Kirisa wo Kile Jozaama pu jo kaa na wε, a nε Kafɔɔ ta w'a kujɔɔ mugɔ wà na mu. ¹³ Ga lee bε na nε bi na zɔ wu ta w'a faha wε, bani nε ta shε na ceborona Tite ta wà wε. Lee wuu na nε koo sha n'a daa fεε pu mu, na gari Masedɔni fiige ki ni.

Se wemu ya daa Kirisa ni ge

¹⁴ Faabye Kile! Wee w'a sefεεεε kaan wèe mu tuun bεeri ni Kirisa wo karijεεεε ki funɔɔ ni, na wèe luu na daga na Kirisa wo macεɛε ki shεε xuu wu bεeri ni, ba nudanga sinmε jε wε. ¹⁵ Bani Kile ya wèe pye Kirisa wo nudanga sinmε. Sipyii piimu na ba shɔ, ni piimu na ba gyεεgi ge, kee nugo ke ya nɔni pee bεeri na. ¹⁶ Kee nugo ke jε xu nugo pii mu pu ni, na pu jaha co na se xu yiri; na jε pii bε mu jii sicuumɔ nugo, na pu jaha co na se jii sicuumɔ yiri. Jɔɔ di jε wee labye we wo jɔ favɔɔ wε? ¹⁷ Wèe kunni ya ta Kile wo Kile Jozaama pu jeri wù jagi jɔɔ ba pii ya pu jeri mu pu wo kuduun kaa na wε. Kile w'a wèe tun, lee wuu na wèe ya Kile Jomɔ pu yεε pyi Kirisa wo karijεεεε ki ni ni funvige ni Kile jaha tàan.

3

Karijεεεε jɔmεεfonɔ li wo kapyebyii pee

¹ Ayiwa, le jogana le ya li shεε na wèe ya jɔ kɔn na wùye pɛle sanha ge? Ta wèe mago wa li na watii wu na sεmε ka tun yee mu, wu wù mɛsaɔɔa jo wee ni, kelee ta wèe mago wa wee sεmε wa tuugo zha na yi mu? ² Yeeyε pyaa ki jε wèe wo sεmε wemu ya wèe mɛsaɔɔa yu, wu nigayahana di jε wèe zɔlɔɔ pu na ge. Sipyii pu bɛeri ya wee sεmε we cε, na wu kalaa bε. ³ L'a fiinɔ na jo yee pu jε Kirisa wo sεmε, wemu w'a tun wèe baraga ni ge. Wee sεmε we ya ta ka ni kama lɔhɔ ni wε, fo Kile jɔi wo wu wo Munaa, w'i ya ta ka faaya kɔɔgɔɔ na wε, fo sipyii zɔlɔɔ.

⁴ Wèe ya dà wee xuu we na Kile jaha tàan Kirisa baraga ni. ⁵ Lee wa nago wèe pu wa giin na wèe na já wee labye we pye ni wùye pyaa wo sefεεεε ni wε, ga Kile ni wèe wo sefεεεε t'a yiri. ⁶ Wee w'a sefεεεε kan wèe mu, na wèe pye karijεεge nivonɔ ki wo kapyebyii. Kee ya ta saliya wu gbɔɔɔ ni wε, ga fo Fεfεεεε Munaa. Bani saliya wu ni xu ya daa, ga Fεfεεεε Munaa di jɔi sicuumɔ kaan.

⁷ Saliya wemu w'a ka faaya kɔɔgɔɔ ki na ge, wee w'a xu nɔni sipya na. Ga lee bε na Kile wo nɔɔɔ w'a wuyε shε wee tuun we ni, fo na Izirayeli shεεn pye pu ya já jɔi cori Musa ni, di wu wii wu jaha niɔ ni, wu jaha ki wo nɔɔɔ wu keɔε ni wε, na ta wee nɔɔɔ we di bi da ba doro. ⁸ Ta Kile Munaa li wo labye wu wo nɔɔɔ wu da ba ye wee na na kanha wε? ⁹ Ayiwa, labye we w'a jaagi shaan sipyii jɔnɔ ni ge, wee bi pye ni nɔɔɔ ni, wee tuun wu ni, labye we w'a sipya pyi sipyitiimε Kile jaha tàan ge, ta wee wo nɔɔɔ wu da ba bεle xuuni na toro we wu tàan wε? ¹⁰ Nimε wo nɔɔɔ wemu w'a pɛle fo xuuni ge, ma bu wee jate ni taashiine li wo wu ni, m'a taashiine li wo wu ta wee jε yaaga bε wε. ¹¹ Kaa

lemu li da ba xhɔ ge, ni lee d'a pye ni nɔɔrɔ ni. Wee tuun wu ni lemu li da gori yaha xɔbaa ge, lee wo nɔɔrɔ wu na ba bɛɛ fo xuuni dɛ!

¹² Kee tadaŋa ke ki wa wɛe mu ge, kee k'a samɔhɔrɔ le wɛe ni fo xuuni. ¹³ Wɛe ya li pyi Kile tudunmɔɔ Musa wo pyegana li na wɛ. Fàŋa Musa bi ma daga wu ŋaha tɔ, kɔnhɔ Izirayeli shɛen ganha bu wee nɔɔrɔ nidoromɔ we ŋa taxɔgɔ ni wɛ. ¹⁴ Ga pu fungɔnyɔ yi bi tɔ. Ali niŋaa we bɛ ni, pu ba Kariŋɛɛge Ŋɔmɛɛ Nilɛɛ li kalaa, p'a bye kanna kee fàŋa ke k'a buri pu fungɔnyɔ yi na. Kee fàŋa ke di ya ta laha wà wɛ, bani na pye ni Kirisa ni kariŋɛɛge ni, lee yɛ l'a ki lɛri wà. ¹⁵ Ali niŋaa we bɛ ni, pu ba Musa wo sɛmɛ wa kalaa tuun bɛeri ni, p'a bye kanna fàŋa k'a buri pu fungɔnyɔ yi na, xuu wemu p'a galaa ge, pu da ga wu ŋaha cɛ wɛ. ¹⁶ Ga wemu bu sɔɔ na wuyɛ kan Kafɔɔ mu, kee fàŋa ke na laha weefɔɔ wo fungɔngɔ ki na.* ¹⁷ Ayiwa, Kafɔɔ wemu kaa pu wa yu naha ge, wee ŋɛ Fɛfɛɛɛɛ Munaa. Kafɔɔ Munaa bu bye xuu wemu ni, wee xuu wu na bye wuyɛ wo. ¹⁸ Wɛe piimu bɛeri wo fàya y'a laha laha nahaya yi na ge, wɛe bɛeri p'a Kafɔɔ wo nɔɔrɔ wu shɛɛ ba jaawiige ya yanmuyɔ shɛɛ mɛ wɛ. Lee funŋɔ ni wɛe ya ŋɛri na byi ba Kafɔɔ yɛ pyaa ŋɛ wɛ, na fɔro nɔɔrɔ wa ni, na jin wa ni. Wee labye we, Kafɔɔ wo Munaa l'a wee pyi.

4

Pɔli ni wu kafɛ pu wo labye wu pyegana

¹ Ayiwa, Kile w'a ŋuŋɔ ŋaari wɛe na, na we labye we kaa le wɛe keŋɛ ni, lee l'a wɛe pye wɛe

* **3:16** Ekizode 34:34

yatenye da ga xhu we labye we na we. ² Nohodaan kapyegee kiimu beeri ki ne shiige wogoo ge, we ya wu tooo wolo kee beeri ni. Wee ya shizhiinme taga na keree pyi we. Wee ya Kile wo jomɔ pu neri na zhaan we. Ga can wu we ya fiinne na yu, kɔnhɔ sipyii pu beeri nigin nigin di da wu mesaanɔ yu sipyii ni Kile naha taan. ³ Lee be na Kile Jozaama pemu we ya yu ge, pee bu she da p'a nmɔhɔ, piimu pu da ba gyeege niga na ge, pee na p'a nmɔhɔ. ⁴ Pu da ga da we, bani Shitaanni wemu ke kɔhɔ ke ya bele ge, wee w'a pu fungonyɔ neri buri, kɔnhɔ kpeenge ki ganha ba ni pu mu we. Kirisa wemu wu ne Kile wo jaa wu ge, wu nooɔ wu wo Jozaama pu p'a kee kpeenge ki yeege. ⁵ Kile Jozaama pemu wo yere we ya byi ge, we ya ta na wuyee kaa yu we. Yesu Kirisa wemu wu ne Kafɔ wu ge, wee kaa we ya yu. Yesu wuu na we ya pye yee wo kapyebyii. ⁶ Kile wemu w'a jo taashiine li ni na: «Kpeenge ki pye nibiige ki ni ge»* wee ninumɔ w'a kpeenge yeege we zɔɔ pu na, kɔnhɔ Kile wo nooɔ wemu w'a ni na foro Kirisa wo naha ki ni ge, we di wee nooɔ we wo laje wu ta, wu da kpeenge yeege wu mu.

Kanhama pemu ya nɔni Pɔli ni wu kaafɛ na ge

⁷ Wee na ne ba cogo shɔhɔ ne we, ga wee naafu-ugbɔ we di ne we mu. Lee ya pye kɔnhɔ sipyii di li ce na tee sefere nigbooɔ te ya ta foro we ni we, ga Kile ni t'a foro. ⁸ Kanhama tuugo beeri kunni wa nɔni we na, ga we fanhaya di sanha xhɔ we. Wee fungonyɔ yi kunni wa wuregi, ga tadanɔ sanha fɔ we na we. ⁹ Pu kunni wa taha wu feni na gana,

* 4:6 Zhenzi 1:3

ga Kilε di ya wèe yaha wε. Pu kunni wa wù kpɔɔn na zhaan ɲiɲε na, ga wù sanha xhu wε. ¹⁰ Tuun bεeri ni Yesu wo xugana li tuugo ya nɔni wèe na wù ceepuuro ti ni. Ga Kilε di wèe shuu, kɔnhɔ p'i li cε na ɲi na Yesu ɲε, wèe bε di ɲiifεεε pyi wee baraga ni. ¹¹ Bani xu ɲɔ na wèe ɲε tuun bεeri ni, wù wo ɲiifεεε ti ni Yesu wuu na, kɔnhɔ Yesu bε wo ɲiifεεε t'i tiyε shε wèe ceepuuro ti ni, tee temu ti da ba xhu ge. ¹² Lee pyegana le na xu ya wu wo labye wu pyi wèe na, kɔnhɔ ɲi sicuumɔ pu da nɔni yee na. ¹³ L'a ka Kilε Kafila wu ni na: «Nε dà Kilε na, lee l'a nε pye nε jo.»* Kee tadaɲa ke ninuɲɔ na wèe bε ya dà, lee l'a wèe bε pye wèe na yu. ¹⁴ Wèe ya li cε na jo Kilε wemu w'a wù Kafɔɔ Yesu ɲε na yeege xu ni ge, wee na ba wèe bε ɲε na yeege xu ni ni Yesu ni, na wèe ni yee bεeri pinne Yesu ɲaha tãan. ¹⁵ Kee keree kii bεeri wa nɔni wèe na, kɔnhɔ Kilε wo niime wu da nɔni sipyiɲehεmεε na. Lee di bye kaɲuɲɔ sipyiɲehεmεε di da baraga tɛri Kilε na, pu da wu pεε.

Na ɲiifεεε pyi n'a daa gbɔɔrɔ ni

¹⁶ Lee l'a wèe pye wèe ya ganri wε. Ali na wèe ceepuuro ti fanha ki yaha ki na xhuu, la l'a faraa ɲiga bεeri wèe munaa li wo fanha ki na. ¹⁷ Kanhama pemu bεeri p'a nɔni wèe na nime ge, pu na ba doro. Pu na ba pεεɲε kemu nɔ wèe na ge, pee kanhama pu ɲε yaaga bε kee pεεɲε ke ɲaha tãan wε. Kee pεεɲε ke ya sii pεε, na ɲε tɛhεnε baa. ¹⁸ Bani sipyii ya yaɲmuyɔ yemu ɲaa ge, wèe ya ɲii yeege yee feni wε, ga fo yemu yi ɲε niɲabaaya ge.

* **4:13** Zaburuu 116:10

Yemu sipyii ya ɲaa ge, yee na ba doro, ga yemu ɲε yi ya ɲaa-i ge, yee na gori yaha gbee.

5

¹ Buguloo piimu funyɔ ni wèe wa tiin naha ke ɲiɲε ke na wù ceepuuro ti ge, pee buguloo pu ga ba gyεεgi, pusaaya ya wa fugba we ni Kilε na yee yàa yaha wà wèe mu. Kee tatεεngε ke wa sii wà gbee. Kee wa sipya wo keɲε labye wε. ² Na wèe yaha naha pee buguloo pii ni, wèe wa zhiin, bani wèe wa fugba wu wo tatiinyε yi wo jé wu la pyi fo xuuni. ³ Wù bu lee ta wù munahaa ki na ceepuuro nivɔɔ ta le. ⁴ Na wèe yaha pee buguloo pii ni, wèe wa zhiin, tuguro ti wa wù ɲuɲɔ ni. Ceepuuro temu ti wa wèe na naha ɲiɲε ke na ge, li wa nago wèe wa giin wù tee wolo wε. Ga wèe wa giin wù fugba wu wo ceepuuro ti lɔ le wùye na, kɔnhɔ ceepuuro temu ya xhuli wε, tee di te ti faa, temu na ba xhu ge. ⁵ Kilε ye pyaa k'a wèe yàa kee keree kii kaa na. W'a wu Munaa li kan wèe mu. Lee ya li shεε na wù na ba ye yaɲmuyɔ ye ta can na. ⁶ Lee l'a wèe pye wèe ya logoo waha tuun bεeri ni. Wèe ya li cε na jo na wèe yaha naha ni tee ceepuuro te ni, wèe sanha k'a lii Kafɔɔ na.

⁷ N'a daa baraga ni wèe ya ɲaari, li wa nago wèe ya li ɲa wε. ⁸ Wèe logoo ya waha fo xuuni. Wèe funɲɔ ki wa na foro te ceepuuro te ni, na she diin Kafɔɔ taan. ⁹ Lee wuu na, wèe ya xu yoo, wèe ya pye ɲi na yoo, lemu l'a dan wèe ni ge, lee li ɲε na wùye kaa taan Kafɔɔ mu. ¹⁰ Bani li waha l'i waha wèe bεeri na ba she yere Kirisa ɲahagbaa na, w'a kiiri kɔn wù na, kɔnhɔ sipyii pu bεeri nigin nigin ya lemu pye na pu yaha te ceepuuro te ni ge, l'a

pye nizaana la, l'a pye niguunɔ la, p'i lee wo saraa ta.

Kirisa w'a be leni Kile ni sipyii te ni

¹¹ Sipya ya yaa na fyagi Kafɔɔ na fyagana lemu na ge, wèe ya lee ce, lee wuu na wèe wa seegε taan sipyii pu na, kɔnhɔ p'i sɔɔ Kile na. Kile ya wèe keree beeri ce fo xuuni. Ne giin jo lee cegana li na yee be ya wèe ce. ¹² Wèe ya ta na wù mesaaŋa yu yi mu sanha we. Ga lemu na bye kaŋuŋɔ yee di já ŋuyirige ta wèe keree na ge, lee wèe ya yu yi mu. Piimu p'a puyε peε sipyii ŋeŋaa na, pu funyɔ di ya fiinŋε-ε ge, kɔnhɔ y'i já pee be ŋɔ shɔgana ce. ¹³ Li bi ta nago kanna wèe ŋuŋmogoo k'a yiri, Kile wuu na lee ya pye. Ga li bu da nago kanna wèe fungɔnyɔ y'a tiin, lee wa yee wo kuduun. ¹⁴ Bani Kirisa wo taanŋeεε ke, kee k'a já wèe na. Wèe ya li ce na jo ni shen nigin ya xu sipyii pu beeri tege, wee tuun wu ni, li ŋe kanna sipyii pu beeri p'a xu. ¹⁵ Sipyii pu beeri wuu na w'a xu, kɔnhɔ piimu pu wa ŋii na ge, pee ganha ba pu wo ŋiifεεε ti pyi nige puyε nidaan na we. Ga wemu w'a xu pu tege, na ŋe pu wuu na ge, pu da ti pyi wee wo nidaan na.

¹⁶ Ayiwa, nime kunni wèe da ga sipya wa shishiin wii nige na saha ni sipyii wo wiigana ni we. Ali wèe ŋehe da wèe na bi Kirisa wii na saha ni sipyii wo wiigana ni, wèe da ga wu wii mu nige nime we. ¹⁷ Sipya wemu bu jé Kirisa wo kariŋeεε ki ni, weefɔɔ na ŋeri sipyifomɔ. Keree kiimu ki ŋe nilεgeε ge, kee beeri na doro, keree kiimu ki ŋe nivonɔɔ ge, kee na ŋɔ kɔn. ¹⁸ Lee beeri ya foro Kile ni. Wee w'a be le wèe ni wuyε pyaa te ni Kirisa baraga ni. W'a wee labye we kaa le wèe keŋε ni,

kɔnhɔ wèe di bye kaɲuŋɔ bɛ di jé wu ni sipyii pu tɛ ni. ¹⁹ Bani Kirisa wo baraga ni Kile ya bɛ le wu ni sipyii tɛ ni. Wu ya ta pu jurumu wu tɔrɔ pu fɛni wɛ. W'a wee labye wu kaa le wèe keɲɛ ni, kɔnhɔ bɛ di bye wu ni sipyii pu tɛ ni.

²⁰ Lee wuu na wèe ya pye Kirisa yahama ni, na yu wu tɛgɛ. L'a pye kanna Kile w'a wu kafila wu yɛɛ pyi wèe ɲɔ na. Wèe wa yi ɲɛɛri Kirisa mɛgɛ ki wuu na, jo yi sɔɔ bɛ di jé yi ni Kile tɛ ni. ²¹ Kirisa ya ta jurumu wa shishiin pye ɲa wɛ, a Kile di wee taga jurumupyii pu faa, kɔnhɔ wèe di já pye ni wu ni kariɲɛgɛ ni, wù bye sipyitiimɛɛ Kile ɲaha tàan.

6

¹ Lee wuu na, wèe piimu pu ɲɛ kapyebyɛɲii ni Kile ni ge, wèe wa yi ɲɛɛri jo Kile wo niime wemu y'a ta ge, yi ganha bu wee yaha wu pa bye ɲuɲɔ baa wɛ. ² Bani Kile ya li she wu Kafila wu ni na:

«Na wo ɲidaan tuun ni
 nɛ mu ɲɛɛgɛ ki logo,
 ɲuwuuro ti wo caɲa ɲii li ni
 nɛ mu tɛgɛ.»*

Nimɛ wu ɲɛ Kile wo ɲidaan tuun we; nimɛ wu ɲɛ ɲuwuuro ti wo caɲa ɲii le.

Kile wo kapyebyii p'a yaa na kanhama soro

³ Wèe funɲɔ wa sipya wa shishiin wu tatigiɲɛ ta wù labye wu na wɛ. Lee wuu na wèe funɲɔ wa wèe pu kaa la shishiin pye lemu na sipya wa shishiin ɲuɲɔ kyɛɛgi wɛ. ⁴ Lee wuu na wèe wa wùye sheɛ shegana bɛɛri na na Kile wo kapyebyii wèe ɲɛ. Wèe ya kanhama niɲɛhɛmɛ soro, na kawagaa ni

* **6:2** Ezayi 49:8

loyirigeree xu lomarana funḡo ni. ⁵ P'a wèe kpòon, na wèe leni kaso ni, na sipyiire ti sòon na waa wù na. Wèe di kapyewagaa pyi, na jaani ḡmunumò baara ni xuugo kenε ni. ⁶ Wèe ya wùye shεε Kile wo kapyebyii tifiire funḡo ni, ni laje, ni loxulo, ni saama, Fεfεεεε Munaa li wo sefεεεε ti ni, ni see see taanḡεεεε ni. ⁷ Wèe wa lee shεε Kile wo can wu jo funḡo ni, ni Kile wo sefεεεε ti baraga ni. Lemu li ḡe wèe wo kashen yagbonḡo, na yogo kòon, na yogo yu wèe kaa na ge, lee ḡe kaa lemu l'a tii Kile mu ge. ⁸ Tuun wa ma nò p'a ganha na gbòòrò tɛri wèe na; tuun wa na ba nò p'a ganha na fanhara tɛri wèe na. Wèe mεsaanḡa wa yu; wèe mεkyεεḡenε bε di yu. P'a wèe jateni ba kafinεjuu ḡe wε, na ta ye wèe ya yu ge, yee di ḡe can we. ⁹ Wèe ḡe kanna pu ya wèe cε wε, na ta pu d'a wèe cε fo xuuni. P'a wèe jateni kanna wèe ya xu, na ta wèe di ḡe ḡi na. P'a wèe leni jaan, ga wèe da xhuu wε. ¹⁰ P'a wèe wii na zò mεsuu l'a pεle wèe na, na ta wèe funyò d'a taan tuun bεeri ni. P'a wèe wii la baa fεε, na ta wèe d'a sipyiḡehεmεε pye lafεε. P'a wèe wii na yafiin ḡe wèe mu wε, na ta yanḡmuyò yi bεeri di ḡe wèe woyò.

¹¹ Na cebooloo Korente shεen, wèe ya wù zòlò pu bεeri mug, na kafilafyen jo yee mu. ¹² Wèe kunni ya ta wù funyò buri yee na wε, ga yee p'a yi funyò buri wèe na. ¹³ Ayiwa, nime kunni nε yu ni yee ni ba na nagoo ḡe wε. Wèe ya yee co cogana lemu na wù zòlò pu na ge, yi bε pu wù co mu! Yi bε pu yi wo zòlò pu mug wù mu!

Y'a yiyε kasεri Kile cεbaalaa wo kapyegεe kii shi na

14 Ayiwa, piimu ne Kiriceen we, yi ganha ba binnεε ni pee ni pu wo kapyegee kii shi na we. Be weke wu wa tiime ni kuumo te ni we? Pinnεgana leke na kpeenge ni nibiige di da ja binnε we? 15 Be weke wu da ja bye Kirisa ni Shitaanni te ni we? Wemu ne Kiricen we, karihege keke k'i da ja bye weefoo ni n'a daa foo te ni we? 16 Be weke w'i da ja bye Kile-peene pugboh ni yapeere te ni we? Bani we pu ne Kile ni wo wu wo Kile-peene pugboh ma na jo ba Kile wuyε pyaa ya yi jo wu Kafila wu ni we na:

«Ne na ba diin pu niε ni,
na jaari ni pu ni.

Ne na ba bye pu Kile,
p'a bye ne sipyii.»*

17 «Lee wuu na Kafoo ya jo:

Yi foro pu te ni,
yi waa laha pu na.

Yaaga kemu ne feefe we,
yi ganha bu da gbɔn kee ka shishiin na we!

Yi bu ja lee na,
ne na zoo yi na.»*

18 «Ne na bye yi To,
yi na bye ne jalaa ni na poro pushaa.

Kafoo, Se Bεeri Foo w'a jo mu.»*

7

1 Ayiwa na taanjiinεε, ba ni Kile d'a kii jomεheε kii bεeri lo weε mu, wee tuun wu ni weε ya yaa na

* 6:16 Levitike 26:12; Zheremi 32:38; Ezekiyeli 37:27

* 6:17

Ezayi 52:11 * 6:18 2 Samuweli 7:14

wù ceepuuro te ni wù zɔlɔɔ pu pye fɛɛfɛɛ, na foro fɔɔnrɔ keree tuuyo bɛɛri ni. Wù la le wùye ni wù fɛɛfɛɛ ti nɔ di fa, wù da jaari Kile jùì fyaara ni.

Pɔli wo fundanga ki keree

²Yi yi zɔlɔɔ pu mugi wù mu, wù kaa di daan yi ni! Wèe ya ta bahamu shan sipya wa shishiin na wɛ. Wèe ya ta sipya wa shishiin jɔnɔ kyɛɛgi wɛ. Wèe ya ta pii wo yanmuyɔ shɔ pu na na taga wùye pye lafɛɛ wɛ. ³Yi ganha ba giin na nɛ ye yu kɔnhɔ di jaagi shan yi na wɛ! Nɛ tee yee jo toro yee mu jo yee kaa ya dan wèe ni fo xuuni. Yafiin wa da já wèe waa laha wùye na wɛ, ali xu bɛ wɛ. ⁴Nɛ dà yee na fo xuuni. Nɛ yee mɛsaɔɔ ya yu fo xuuni. Nɛ luu l'a jɔnɛ fo saama na. Kanhama pemu bɛɛri p'a nɔni wèe na ge, nɛ funɔɔ ma sii taan fo xuuni pu ni.

⁵Can na, wèe di nɔ Masedɔni fiige ki ni ge, wèe jaha sanha jɔnɛ bada wɛ. Kanhama ni wèe di bye kabaya yi bɛɛri na. Wù ni sipyii pusamaa bi dunnɔ, fyaara di jɛ wùye pyaa ki bɛ wo zɔlɔɔ pu ni.

⁶Ga Kile wemu w'a lojɔnɛ kaan sipyicɔnrɔyɔ mu ge, wee ya wèe logoo jɔnɛ Tite wo ba wu kenɛ kurogo.

⁷Ayiwa, Tite wo ba wu ye bɛ-ɛ dɛ! Ga yee ya wu luu jɔnɛ jɔnɛgana lemu na ge, lee ya wèe fungɔnyɔ yi tenɛ. W'a pa wèe pye na nɛ ja la k'a sii shɔ yee ni. Na yee ya daajɛnɛ jo, na yee ya nɛ keree co ni see ni xuuni. Lee ya la fara nɛ wo fundanga ki na fo xuuni.

⁸Nɛ fɛnhɛ sɛmɛ wemu tun yee mu ge, ali na wee sɛmɛ we ta w'a bi zɔ mɛsuu wá bɛ yee na, lee wo daajɛnɛ jɛ nige nɛ ni wɛ. Li daajɛnɛ bye nɛ ni, bani nɛ bi sɛmɛ wu ta w'a zɔ mɛsuu wá yee na jɛɛɛ ye nigin funɔɔ ni. ⁹Ga nime nɛ funɔɔ ya taan. Yee

zɔlɔɔ na mɛhɛɛ suu, lee ya ta pye nɛ wo fundanga ki kaɲuŋɔ-ɛ dɛ! Ga lee zɔ mɛsuu le na yee pye yee ya kuri kadugo, na yi ɲaarigana faa, lee l'a nɛ funŋɔ taan. Yee wo zɔ mɛsuu l'a pye na saha ni Kilɛ wo ɲidaan ni. Lee funŋɔ ni lemu wɛɛ ya pye yee na ge, lee ya ta pye kakuunɔ wɛ. ¹⁰ Bani zɔ mɛsuu lemu ya sipya taa na saha ni Kilɛ yɛ pyaa wo ɲidaan wu ni ge, lee ma sipya pye m'a ma torogana li faa, na ɲuwuuro ta. Lee zɔ mɛsuu le tuugo ya sipyii pyi pu na daajɛ yu Kilɛ ɲaha taa. Ga koŋɔ ya zɔ mɛsuu lemu nɔni sipya na ge, lee l'a ma ni xu ni. ¹¹ Zɔ mɛsuu lemu l'a yee ta na saha ni Kilɛ wo ɲidaan wu ni ge, l'a lemu ɲɔ ge, lee li wa mɛ. Yee ya yi see bɛɛri le le kaa le ni. Yee ya can wu sha xuuni. Yee ya ɲahaya tanha fo xuuni. Yee ya fya fo xuuni. Nɛ ɲa la bi shɔ yee ni fo xuuni. Yee zɔlɔɔ pu bɛɛri bi ɲaha tii le kaa nigin we na. Yee ya jaagi pye xuuni le kaa le shizhaa na. Yee ya li she shegana bɛɛri na na yee tɔɔgɔ wa le kaa le ni wɛ.

¹² Ma bu logo nɛ we sɛmɛ we tun yee mu, wemu w'a kakuunɔ li pye ge, ni wemu na l'a pye ge, nɛ ta wu tun wee wa shishiin wuu na wɛ. Ga nɛ wu tun yee mu, yee ya yiyɛ kan kangana lemu na wɛɛ wuu na ge, y'i lee cɛ Kilɛ ɲaha taa. ¹³ Lee l'a wɛɛ logoo ki pye k'a ɲiɲɛ. Yee ya Tite fungɔngɔ ki teɲɛ, a wu funŋɔ di daan taangana lemu na ge, lee bɛ ya pye wɛɛ mu fundangbɔhɔ na fara loɲinɛ li na. ¹⁴ Nɛ yee sɔ keree kii shizhaa na Tite mu, di wa ta shiige lee kabaɲa na wɛ. Wɛɛ ya can jo yee mu wu keree ki bɛɛri ni jogana lemu na ge, lee funŋɔ ni yee wo mɛsaɲa kemu wɛɛ ya jo Tite mu ge, a yee bɛ di da can. ¹⁵ Wu taanɲɛɛɛ k'a ɲɛri pɛɛ bɛ yee shizhaa na, bani wu funŋɔ w'a dun ni yee bɛɛri

nigin nigin wu wo ɲɔmɛɛcoro ti ni. Yee ya wu ɲuɲɔ círi ni baraga kemu ni, na fya wu na, na yiyɛ tirige wu mu tirigegana lemu na ge, wu funɲɔ w'a dun ni lee bɛ ni. ¹⁶ Nɛ funɲɔ ya taan fo xuuni, bani nɛ na já da daa yee na keree bɛɛri ni.

8

Masedɔni fiige ki n'a daa fɛɛ p'a wari wemu pinne ge

¹ Ayiwa na cebooloo, Kilɛ ya niimɛ wemu pye Masedɔni fiige ki egilizii pu mu ge, wù funɲɔ ki wa wù yee ɲaha jo yi mu. ² Kanhama nigbɔ pu bye pu ɲuɲɔ ni. Ga p'a fundanga ta xuuni, fo na keɲɛ mugi pu keɲɛ yara na, na pii kan xuuni, ali na pu ta pu na ɲɛ bɛ la baa fɛɛ. ³ Nɛ wa lee wo sɛɛri nago kanna p'a pii kan na bɛ ni pu se ɲuɲɔ kana ni. Pu yɛɛ ya toro bɛ pu se ɲuɲɔ kana tàan, ali na ta wa ya pu karamu bɛ wɛ. ⁴ P'a sii wèe tii ɲɛɛri saama na, na wèe pu sɔɔ pu mu, pu bɛ di pu wo dɛgɛ kan shɛ Kilɛ wo fɛfɛɛɛ wuu pu mu Zhude fiige ki ni. ⁵ Wèe bi daa pu na jo pu na lemu pye ge, p'a toro bɛ yɛɛ lee tàan. P'a fɛnhɛ puyɛ kan Kafɔɔ mu, lee kadugo na na puyɛ yaha wèe bɛ keɲɛ na na saha ni Kilɛ yɛ pyaa ɲidaan ni. ⁶ Lee wuu na wèe ya Tite ɲɛɛri na jo w'a bi labye nizaama wemu ɲɔ kɔn yee yíri keɲɛ yakanya yi wo shizhaa na ge, jo wu shɛ yi yíri w'i shɛ wee labye wu ɲɔ fa. ⁷ Yee ya pye ɲaha na keree bɛɛri ni: n'a daa fɛɛɛ yoo, kafila yoo, lajɛ yoo, ni sɛɛtanga tuugo bɛɛri. Wèe ya taan yee mu taangana lemu na ge, na fara kee taanɲɛɛgɛ ki bɛ na. Wèe funɲɔ ki wa y'i bye ɲaha na we labye nizaama we bɛ ni. ⁸ Li

wa nago kanna n'a yi karamu fo yi li pye fanha na wε. Ga nε pii wo lowagaa keree yu yi mu, kɔnhɔ di yi wo taanηεεγε ki nɔhɔ wolo wii ki bi ηε see see taanηεεγε. ⁹ Bani wù Kafɔɔ Yesu Kirisa ya wu wo niimε wu shε shεgana lemu na ge, yi bεeri wa lee cε. Wee bye yara fɔɔ, a wu wuyε pye la baa fɔɔ yee wuu na, kɔnhɔ yee di bye yara fεε wu wo la baa fεεε ti baraga ni.

¹⁰ Na fungɔngɔ n'a zhεε yε yi na, nago kanna y'a kaa lemu ηɔ kɔn tɔnee ge, yi bu lee pye na li ηɔ fa, lee ya ηɔ xuuni. Yee p'a pye shenshiilee na le kaa le ηɔ kɔn, lee yε bε wε, yee p'a nɔhɔ pye shenshiilee sanha na le kaa le bye fungɔngɔ ta. ¹¹ Lee wuu na, yi shε jaha na le kaa le feni, y'i li pye y'i li ηɔ fa. Lee kaa le funηɔ ya tigi yi mu ni zɔsaama wemu ni ge, yi li pye y'i li ηɔ fa ni wee zɔsaama we ninumɔ ni, na saha ni yi se ηunηɔ kana ni. ¹² Bani Kilε gan fungɔngɔ bu digi sipya mu, Kilε ya sɔɔ kee yakanga ke na, na saha ni wu kenε yataa ni. Ga yaaga kemu se ηε wu ni wε, kee niηε ηε wε.

¹³ Li wa nago kanna yi pusamaa wo cɔnrɔmɔ pu laha, yiye pyaa di do cɔnrɔmɔ pu ni-i dε! Ga y'a yaa na li pye, kɔnhɔ yi bεeri di daanna. ¹⁴ Nime kunni, la wa yee mu, lee wuu na yee na já la baa fεε pu tεγε. Ayiwa, la baa fεεε ti ga ba nɔ yee bε na, na pee bε ta p'a ηeri lafεε, pee bε na já yee tεγε. Lee funηɔ ni, yi bεeri na daanna, ¹⁵ ma na jo ba l'a ka Kilε Kafila wu ni kagana lemu na wε na:

«Wemu w'a niηεhemε kuu ge,
wee wo wusama ya kori wε;
Wemu w'a dɔɔni kuu ge,

wee be wo wu ya xuunɔ we.»*

Tite ni wu kaafɛɛ

¹⁶ Baaga Kilɛ, bani w'a lowaa le Tite ni yee keree na ma na jo ba wèe jɛ wɛ. ¹⁷ Wèe ya lemu sha Tite mu ge, w'a sɔɔ lee na. Ga yee keree wa bye wu zɔ na fo xuuni, fo wuyɛ pyaa ya li kɔn wuyɛ funɔ ni na wu shɛ yee yiri. ¹⁸ Egilizii pu bæeri ya ceborona wemu sɔni wu labye nizaama wu wuu na Kilɛ Jozaama pu wo yɛɛ li shizhaa na ge, wee w'à da binne ni Tite ni na tun. ¹⁹ Lee yɛ be wɛ, jara lemu wèe ya byi na jaha tii Kilɛ wo taa li keree ki na ge, wee ceborona wu jaha egilizii p'a bulo na wu pinne ni wèe ni lee jara li na. Wèe ya lee jara li pyi, kɔnhɔ nɔɔɔ di danha Kafɔɔ mɛge na, wù nɔhɔ wù fungɔngɔ nizaanɔ ki shɛ sipyii pu wo dɛge wu shizhaa na.

²⁰ Le shɔɔnrigana le na wèe ya we warigbɔ we keree jaha shɔɔnri. Wèe ya keree bæeri pyi kɔnhɔ sipyii ganha bu jaagi ta wù na xuu wa shishiin ni le kaa le ni wɛ. ²¹ Bani wèe funɔ ki wa wù da saama koro jaaari, Kafɔɔ yɛ jaha tàan be wɛ, ga sipyii pu be jaha tàan. ²² Wù ceborona wa be w'à da binne ni pu ni. Wèe ya wu nɔhɔ wolo tɔɔjii nijɛhɛɛɛ ni, na wu ta w'a la le wuyɛ ni xuuni tuun bæeri ni. Ga w'a la le wuyɛ ni nime na toro taashiine li be tàan, bani w'a dà yee na fo xuuni. ²³ We wu jɛ Tite ge, wee jɛ na jaaarijii ni na kapyebyejii. Yee mu wèe ya kapyɛɛ pyi. Cebooloo pusamaa p'a pinne ni wu ni ge, pee jɛ egilizii pu wo tudunmɔɔ. Pee ya pye sipyii piimu p'a pɛɛɛ taha Kirisa mɛge na ge. ²⁴ Lee wuu na, y'a yaa na li shɛ pu na na pu kaa ya

* **8:15** Ekizode 16:18

dan yee ni fo xuuni, kɔnhɔ egilizii p'i lee na, p'i li ce na kajii wa wɛe mu na yee mesaanja yu.

9

Dɛgɛ wemu ya nahaha tii cebooloo n'a daa fɛɛ pu na ge

¹ Can na, dɛgɛ wemu w'a byi Zhude fiige ki n'a daa fɛɛ pu na ge, nɛ li ta jo ɲuɲɔ wa li na nɛ wu na sɛmɛ ka sanha di dun yee mu wee dɛgɛ wu keree na wɛ. ² Bani nɛ yee ɲidaan ce na xɔ wee labye wu kabaɲa na. Nɛ yee mesaanja jo xɔ be yeɛ Masedɔni n'a daa fɛɛ pu mu. Nɛ pu pye: «Akayi fiige ki cebooloo p'a gbegele xɔ p'i dɛgɛ pye na co fo tajeɛ na.» Yee wo samɔhɔɔ t'a pye kaɲuɲɔ na lowaa kan n'a daa fɛɛ niɲɛhɛmɛɛ mu. ³ Ga lee be na, n'a da wu cebooloo pu tun yi mu, kɔnhɔ masɔɲɔ kemu wɛe ya pye yee na we labye we shizhaa na ge, kee ganha bu bye ɲuɲɔ baa wogo wɛ. Nɛ funɲɔ ki wa p'i shɛ yi ta y'a gbegele xɔ, ma na jo ba nɛ yi jo wɛ. ⁴ Lee be wɛ, Masedɔni shɛɛn pii bu binne kari ni nɛ ni yee yiri, na shɛ yee ta yee ya ta gbegele wɛ, lee na bye wɛe mu shiige, bani wɛe ya da yee na. Li na bye yee be wo shiige. ⁵ Lee wuu na nɛ li kɔn naye funɲɔ ni jo nɛ yaa na pii ceboronamaa pii ɲɛɛri jo pu toro na nahaha na yee yiri. Loolodaa lemu kaa yee ya jo ge, kɔnhɔ p'i shɛ lee keree nahaha shɔɔnri sani di ba shɛ wà ge. Lee na ba li shɛ na daan na mu funɲɔ ni lee loolodaa l'a kan, na li ya ta pye fanha kaa wɛ.

⁶ Yi li ce na wemu bu shinma nifɛnhɛɲɛɛ nugi, shinma nifɛnhɛɲɛɛ ma da ba gɔn. Wemu shiin bu shinma niɲɛhɛmɛɛ nugi, shinma niɲɛhɛmɛɛ weefɔɔ da ba gɔn. ⁷ Wemu beɛri ya lemu wo tɛhɛnɛ kɔn

wu funḡo ni ge, wu lee kan. Wee gan we ganha bu da bye ni zo məsuu ni wε, kelee fanha kaa wε. Bani sipya wemu w'a gan pyi ni fundanga ni ge, wee kaa l'a dan Kilε ni. ⁸ Se wa Kilε ni na kasaan̄aa tuuyo bεeri pye yee mu fo na ɲεhε, kɔnhɔ yee mago yaɲmuyɔ bεeri niɲεhεyε di da daa yi mu tuun bεeri, ni keree bεeri ni, kɔnhɔ yi da se ɲaha na kapyegeee nizaan̄aa ni. ⁹ Ma na jo ba l'a ka Kilε Kafila wu ni wε na:

«W'a keɲε mugi wu yataya na,
na la baa fεε kan.

Wu saama pu wa da ga xhɔ bada wε.»*

¹⁰ Kilε wemu w'a nuguzhi kaan yenugumɔ mu, na wu ɲolige bε kaan wu mu ge, wee na ba nuguzhi niɲεhεrε kan yee mu xuuni, kɔnhɔ yee wo saama pu da buri p'a se ɲaha na. ¹¹ Wu na ba saama tuugo bεeri pyi yee mu, kɔnhɔ yi bε di keɲε mugi yi yataya na. Wèe na zhε yee wo yakanya yi loolo piimu na ge, l'a bye kaɲuɲɔ pee na baraga ni masɔɲɔ taha Kilε na yee yakanya ye wuu na. ¹² Bani dεgε wemu yee ya byi ge, wu ya ta na Kilε wo fεfεrε sipyii pu tɛri yε wε. Ga wu na ba bye kaɲuɲɔ sipyiiɲεhεmεε di da baraga tɛri Kilε na, pu da wu sɔni. ¹³ Wee dεgε we bu nɔ pu na, pu na Kilε sɔ, bani yee ya dà Kirisa wo Kilε Jozaama pu na, na ɲaari bε na sahan̄i ni pee Jomɔ pe ni, na nɔhɔ keɲε mugi yi keɲε yataya na pee mu, na ki mugi sipyii pusamaa bε mu. ¹⁴ Kilε ya niimε nigbɔ wemu pye yee mu ge, wee na ba pu pye pu na Kilε ɲεeri yee mu xuuni, yi kaa bε na ganha na dan pu ni xuuni. ¹⁵ Kilε w'a sɔni wu ma yakanga ki wuu na, w'a yagbɔhɔɲɔ kemu kan wèe mu ni ki ɲɔhɔ ɲε-ε ge!

* 9:9 Zaburuu 112:8

10

Pɔli ya wu labye wu yogo jo

¹ Ayiwa na cebooloo, pii ya jo na ne bu bye yee te ni, na ne ma jine. Ga na ne bu lii yee na, ne ma kafugo le naye ni na wa yee na. Ne Pɔli w'a yi jɛeri Kirisa wo lotaan le, ni wu saama pu wuu na, ² yi ganha bu da na karamu di ba no yi yiri, di kafugo le naye ni di wa yi na we. Bani piimu p'a yu na koɔ sipyii wo fungɔngɔ keree torogana na wɛe ya doroo ge, ne da li na jo ne na zhe kafugo le naye ni na wa pee na. ³ Can wu je wii, wu ceepuuro wuu kunni wa jaari ke koɔ ke funɔ ni, ga wɛe di wa yogo ki koɔn ni ceepuuro fanha ni we. ⁴ Wɛe wo yokɔnyanmuyɔ yi je ke koɔ ke sipyii woyo we, ga Kile woyo yi je yii, fanha je yemu ni ge. Y'a Shitaanni wo kasɔɔyɔ yi shaan. ⁵ Joyaama fara yaaga tuugo beeri na, kemu beeri k'a yogo koɔn Kile wo laje wu na ge, wɛe ya yee beeri jɛri buri. Fungɔnyɔ tuuyo ye beeri wɛe ya guuni, kɔnhɔ y'i Kirisa jɔmɛɛ co. ⁶ Yee wo jɔmɛɛconɔ li jɔ ba fa tuun wemu ni, wɛe ya gbegele xɔ wu jɔmɛɛcobaalaa pu beeri wo fɔhɔ tɔ pu mu.

⁷ Neɔna le yee ya wii sipyii ni. Ayiwa, sipya wa bu da li na na Kirisa wo wee je, weefɔ ya yaa na wu funɔ kɔn li na, na li ce na ba wee je Kirisa wo we, mu wɛe be je Kirisa wuu. ⁸ Bani Kafɔ ya fanha kemu kan wɛe mu ge, ki kaɔnyɔ ki je na yee luu na se jaha na, ki kaɔnyɔ je na yee kyɛgi we. Ali ne jɛhe bi naye pele toro be jɛere ye kee fanha ke wuu na, lee shiige je ne na we. ⁹ Ne funɔ wa di da li shee na semɛɛ pu ni, nago n'a yi fuguri we. ¹⁰ Pii kunni wa yu na ne semɛɛ pu kafila w'a waha, na kafugo

ki ɲε wu ni. Ga na ɲεye pyaa bu nɔ yee yíri, na ɲε ma bye baraga baa sipya, na ɲε jomɔ pu da yaaga bε ɲɔ wε. ¹¹ Piimu p'a yee yu ge, pufεε pu li cε na jogana lemu na wèe ya yu wù sεmεε pu ni na wù ta w'à lii yi na ge, lee wo kapyegeε bε w'à da ba she byi wù ga nɔ yi yíri tuun wemu ni.

¹² Piimu p'a puyε sɔni ge, wèe wa da ga sɔɔ di wùye pye pee sipyii pii p'a tuugo, kelee di wùye taanna ni pu ni wε. Pee ma puyε taanna ni puyε ni, na puyε luu na daanna ni puyε ni. Ta tee ɲε nahanahara wε? ¹³ Wèe kunni wa da wùye pεε fo di zhe doro wù tayerege tàan wε. Ga Kilε ya tɛhεnε lemu wolo kan wèe mu, a lee di bye bε kaɲɲɔ a wèe di nɔ yee na ge, wèe na ba wùye pεε na saha ni lee ni. ¹⁴ Wèe da bye wèe ya nɔ yee na wε, wee tuun wu ni wèe bi da tɛhεnε li toro, ga wèe ya ta li toro wε, bani wèe p'a Kirisa wo Kilε Jozaama pu jo yee mu shεnshiilee. ¹⁵ Lee funɲɔ ni tɛhεnε lemu l'a kɔn wèe kan ge, wèe wa da doro lee tàan wε. Sipyii piitiilee ya labye wemu pye ge, wèe wa da wee kaa lɔ di daga da wùye pεε wε. Wèe ya dà li na nago yee ba she naha na n'a daa wu ni, la na vara xuuni wèe wo labye wu na yee niɲε ni Kilε wo tɛhεnε li funɲɔ ni, w'a lemu kɔn na kan wèe mu ge. ¹⁶ Lee funɲɔ ni fiye yemu yi wa yee kadugo yíri ge, wèe na já zhe Kilε wo Jozaama pu jo yee fiye yi ni, na ta wèe ya wa wo labye lɔ wu tapyege ni na taga wùye pεε wε.

¹⁷ L'a ka Kilε Kafila wu ni na: «Wemu bu jo wu wuyε pεε, wufɔɔ wu wuyε pεε Kilε wo nibyegee kii funɲɔ ni.»* ¹⁸ Bani wemu ba wuyε mesaana yu, wee ya mεge nijenε taa wε, ga Kafɔɔ ye pyaa ya

* **10:17** Zheremi 9:23

wemu wo mɛsaɒŋa yu ge, wee w'a ki taa.

11

Tudunmɔɔ kafinɛjuu pu keree

¹ Aa! Yee da bi da zɔɔ na nɛ wo ɲuŋmoyirinɛ jomɔ pe xu yiyɛ ni jɛri funɲɔ ni dɛ, lee bi da daan nɛ ni. Ayiwa, yi pu xu yiyɛ ni! ² Yee kaa ya dan nɛ ni fo xuuni, fo na ɲɛpɛɛn lenɛ nɛ ni yee shizhaa na. Ga Kilɛ ni lee ya foro. Curɔ nigin pe, wee mu nɛ yee co, wee ɲɛ Kirisa; kɔnhɔ di ba yi kan wu mu ba doɲɲɛ fucɛri nacɛbaa ɲɛ wɛ. ³ Ga nɛ fyagi jo yi fungɔnyɔ ganha da ba ɲɛri, Kirisa wemu na y'a yiyɛ pɔ xuuni ge, fo di yi kurunɲɔ wee fɛni, ma na jo ba wɔ w'a kafinɛyɛ taga Awa faanna, na wu piinɲɛ mɛ wɛ. ⁴ Bani sipya watii bu ba Yesu watii kaa jo yee mu wemu wo kaa jogana ni wɛɛ wo wu kaa jogana ɲɛ nigin wɛ, yee na ɲɛri na dɔ weefɔɔ na. Kilɛ Munaa lemu yee ya ta wɛɛ kenɛ kurogo, kelee Kilɛ Jozaama pemu yee ya logo wɛɛ ɲɔ na ge, yee bu munaa latii ta lemu ni wɛɛ wuu li ɲɛ nigin wɛ, kelee na jozaama patii ta pemu ni wɛɛ wo pu ɲɛ nigin wɛ, yee na wá karaa dɔ yee bɛ na. ⁵ Na li ta pee mɛgbɔhɔ tudunmɔɔ piimu yee ya jatɛni ge, pee ya pɔɔ nɛ na kabaŋa ka shishiin na wɛ. ⁶ Ali nɛ ɲɛhɛ bye nɛ di ya pye kafila cɛvɔɔ fo wu nijemɛ wɛ, cɛmɛ wo koo ni kunni, n'a la cɛ pee ni. Wɛɛ ya lee shɛ yee na shɛgana bɛɛri na, ni keree bɛɛri ni.

⁷ Tuun wemu ni nɛ Kilɛ wo Jozaama pu jo yee mu ma ni ge, nɛ nayɛ tirige, na yee durogo. Ta kakuunɔ li ɲɛ lere gɛ? ⁸ Egilizii piitiilee pu bi nɛ saraa. L'a pye kanna nɛ pee wo naafuu wu shɔ pu na na taga yee tɛgɛ. ⁹ Na nɛ yaha yee yíri, yaŋmuyɔ

ya funmɔ bye nɛ na, ga nɛ ta na wo tuguro ti taha wa shishiin nɔnɔ ni yee ni wɛ. Cebooloo piimu p'a pa na yiri Masedɔni fiige ki ni ge, pee p'a pa nɛ wo mago yanmuyɔ yi kan nɛ mu. Nɛ kasεεge yaha nayɛ na, kɔnhɔ di ganha da bye yee wa shishiin mu tuguro kaa la shishiin ni wɛ. N'a da kasεεge yaha nayɛ na sanha lee kanunɔ le na. ¹⁰ Lee ya pye kaɔnɔ, kemu ya nɛ nɔnɔ yirige Akayi fiige ki bɛɛri ni ge. Sipywa wa shishiin wa da já kee nuyirige ki shɔ nɛ na wɛ. Kirisa wo can we, wee wemu wu nɛ nɛ ni ge, wee wuu na nɛ yee jo. ¹¹ Naha na nɛ d'a yee jo wɛ? Na yee kaa ya dan nɛ ni-i laa? Kile yɛ pyaa bɛ ya lee cɛ na yee kaa ya dan nɛ ni.

¹² Ga pyegana lemu na nɛ na wo labye wu pye yee mu ge, lee pyegana li na n'a da da wu pyi. Piimu p'a kaɔnɔ shaa na puyɛ pɛɛ, na yu na wɛ wo labye pyegana le tuugo pee ya byi ge, lee pyegana li na n'a da da na wo labye wu pyi, kɔnhɔ pee ganha bu kee kaɔnɔ ki ta wɛ. ¹³ Kafinejuu pu nɛ pee tudunmɔɔ piiri. Pu labye wu bɛɛri w'a sipyii piinɛ. P'a puyɛ pye kanna Kirisa wo tudunmɔɔ pee nɛ. ¹⁴ Ga lee nɛ kakanhana wɛ, bani Shitaanni bɛ ya wuyɛ nɛri na byi ba mɛɛkɛ kpɛεngɛ wo nɛ wɛ. ¹⁵ Lee wuu na do, Shitaanni wo kapyebyii bu puyɛ pye kanna Kile wo kapyebyii pee nɛ piimu ya tii ge, lee ya yaa li wa fo wɛ. Ga li taxɔgɔ ki kuduun nɛ wemu ge, wee na ba nɔ pu na na saha ni pu kapyegɛ ni.

Pɔli ya kanhama pemu na wu wo tuduro ti funɔ ni ge

¹⁶ N'a da guri yi taha sanha yi mu jo wa shishiin ganha bu na wii nɔnɔmoyirine fɔ wɛ. Ga yi nɛhɛ ba

na wii nuḡmoyirine fɔɔ, yi na co mu, kɔnhɔ na be di naye peɛe dɔɔni. ¹⁷ Yemu n'a da jo nime ge, Kafɔɔ w'a ta yee le na ɲɔ ni we. Ga la l'a na pye n'a da yee jo. Lee wuu na n'a da jo ba nuḡmoyirine fɔɔ ɲe we. ¹⁸ Ga ma na jo ba shenɲehemee wa puyee peɛe ke koɲɔ ke keree ni we, wee tuun wu ni ne be na naye peɛe ge! ¹⁹ Yee piimu pu ɲe fungɔnyɔ fee ge, a yee di dɛree na nuḡmo-yirilee jomɔ nuri! ²⁰ Pee sipyii pii p'a yee co ba buloo ɲe-ɛ ge, na yee keɲe yanmuyɔ li, na dun yee na, na ɲɔsanga pyi yee na, na kadahaa leni yee ɲahaya ni. A yee di lee xu yiyee ni. ²¹ Shiige ki ɲe ne na pe jomɔ pe tajogo ni, ga ne fanha di wa ɲehɛ ba pee ɲe we, na nuḡɔ be di wa waha ba pee ɲe we.

Ga lee be na keree kiimu kaa p'a daga na puyee peɛe ge, ne be na ja kee kaa taga naye peɛe. Ne yu ba nuḡmoyirine fɔɔ ɲe we. ²² Heburuu pu ɲe pii ya? Wee wa ne be ɲe. Izirayeli shi sheen pu ɲe pii ya? Wee wa ne be ɲe. Ibirayima kadugo shi sheen pu ɲe pii ya? Wee wa ne be ɲe. ²³ Kirisa wo kapyebyii pu ɲe pii ya? Nuḡmoyirine fɔɔ jomɔ n'a da jo. Ne pye Kirisa wo kapyebye na toro pee taan fo xuuni. Ne pu ja kapyenɛɛ ni. Ne kaso jegee, kee ya ɲehɛ pu wogoo na. Ne kpɔɔnrɔ jeri shɔ na toro pee taan. Ne xu fɔ tɔɔɲii niɲehɛɲee ni. ²⁴ Yawutuu p'a ne kpɔn fo tɔɔɲii kaguro, tɔɔɲii beeri susɔ ɲii keɛɛ shishɛɛɛ nigin ma fɔ.* ²⁵ A Oromɛ sheen di na kpɔn fo tɔɔɲii taanri ni kabegɛɛ ni. A p'i kagereye taga na wá na da gbo tɔɔɲii nigin. A kɔɔgbɔhɔ di gyeeɛgi ni na ni fo

* **11:24** Saliya wa bye Oromɛ sheen mu, wee saliya wu bi gbara pu susɔ ɲii keɛɛ shishɛɛɛ (40) taha sipya na we, bani pu bi giin na kee da xhu sipiyawyii ni we, lee na pu ma ɲii nigin laha.

tɔɔɔnii taanri suumɔ lɔhɔ ni. A di caɔa nigin ni piige nigin pye suumɔ lɔhɔ ni. ²⁶ Nε kushεgεε nijεhεɔεε pye. Nε na munaa pεε fɔ gbalaa lɔhɔɔ ni. Nε na munaa pεε fɔ java fεε niɔε ni. Nε na munaa pεε fɔ naye pyaa shi wu niɔε ni, na li pεε fɔ shi watii niɔε ni. Nε na munaa pεε fɔ kulo funɔɔ ni, na li pεε fɔ siponɔɔ ni. Nε na munaa pεε fɔ suumɔ lɔhɔ ni. Ali wù cebooloo piimu p'a puyε pye n'a daa fεε, p'i jε n'a daa fεε-i ge, nε na munaa pεε fɔ pee bε niɔε ni. ²⁷ Nε kapyenεε nijεhεɔεε pye kiimu ya waha ge, na kanhama ja. Nε piiye nijεhεyε shɔn ηmunumɔ xuugo ni. Nε xuugo gba, a waga di la pye na ni. Nε yalige ja, na ki yaha wà tεεgεε nijεhεɔεε ni. Nε wiire gba, na fafunmɔ pye. ²⁸ Kisaɔaa di jε wà. Na fara kee bεeri na, nε bi na funɔɔ shaa ni egilizii pu bεeri kaa ni caɔa bεeri. ²⁹ N'a daa fɔɔ wa baraga bu jεε, nε ma bye kanna nεyε pyaa wo baraga k'a cèε. Wa jɔnɔɔ bu gyεεgi, lee ma sii waha na na fo xuuni.

³⁰ Li bu da nago kanna nε yaa na naye pεε, nε na naye pεε na wo baraga baara ti ni. ³¹ Masɔnɔ k'a dεri wù Kafɔɔ Yesu To Kilε na gbee! Wee ya li cε na nε wa kafinεyε yu wε.

³² Na nε yaha Damasi kulo li ni, caɔa ka saannaa Aretasi wo gbafenεeri w'a pa sipyii pii yaha kulo li tajeye yi bεeri ni, kɔnhɔ p'i nε co. ³³ Ga, a n'a daa fεε p'i nε le sagana ni na yeege fenεtiri ni, na mεεre taga nε tirige kanha ki kadugo. Lee funɔɔ ni a nε shɔ wu na.

12

Pɔli ya kashεgεε kiimu ja ge

¹ Ayiwa, fo ne bu naye peɛ, ba lee di wa yafin jɔgi we. Lee be na, kashɛɛɛ kiimu ne ja, ni Kafɔɔ ya keree kiimu she ne na ge, kee shizhaa na n'a da ba jo nime. ² Ne na wa ce, wu na ne Kirisa wo kariɛɛge ki ni, li yee ke ni shishɛɛɛ wu ne nijee, Kile ya wu la kari fo fugba we ni. (Ayiwa wuyɛ pyaa k'a kari wa la, kelee kashɛɛ Kile ya she wu na la, ne kunni ya lee ce we, Kile w'a lee ce.) ³ Ne kunni ya li ce na jo kanna wee na w'a kari Alijine ni. (Ga wuyɛ pyaa k'a kari wa la, kelee kashɛɛ Kile ya li she wu na la, ne kunni ya lee ce we, Kile w'a lee ce.) ⁴ A wu jomɔ pa logo wee xuu wu ni sipya da ja pemu jo daha we. Li ya saha be yere sipya wu pee jomɔ pu jo we. ⁵ Ayiwa, ne na ja naye peɛ wee sipya we wa shi keree na. Ga ne funɔɔ di wa di naye kaa taga naye peɛ we, fo di bu na baraga baara kaa taga naye peɛ. ⁶ Ali ne nehe jo ne naye peɛ, ne da bye nuɔmoyirine fɔɔ we, bani can n'a da jo. Ga n'a da naye peɛ we, kɔnhɔ keree kiimu n'a byi, na yemu yu sipyii pu nii na ge, pu ganha bu na durogo di doro yee wo nuɔɔ kana taan we.

⁷ Ayiwa, kɔnhɔ tabaara ganha bu je di na ni kee kashɛɛɛ nijɛɛɛ kii wuu na we, a yama nigbɔ pa di je ne cere ti ni. Pee ya ma ne mu ba Shitaanni tudunmɔ ne we, pee ya ne kana, kɔnhɔ tabaara ganha bu je ne ni we. ⁸ Ne Kafɔɔ neeri pee yama pe shizhaa na fo tɔɔɔɔ taanri jo wu pu laha na nuɔɔ ni. ⁹ Ga, a wu ne pye na wee wo niime wu na ne yaa, na sipya baraga bu xhɔ tuun wemu ni, na wee tuun wu ni wee wo sefɛɛɛ t'a zheɛ na fiinne. Lee wuu na l'a taan ne ni ne wu na baraga baara kaa taga naye peɛ, kɔnhɔ Kirisa wo sefɛɛɛ t'i gori yaha na

na. ¹⁰ Lee wuu na ne funɗo taan na baraga baara ti na. Ali pu nehe ba ne shehele, kelee na kawagaa pyi ne na, kelee na ne kana, kelee na ne jaani Kirisa mege ki wuu na, ne na funɗo taan kee beeri wuu na. Bani ne bu bye baraga baa tuun wemu ni, ne ma fanha ta wee tuun weye pyaa ni.

Poli ya pye tuguro n'a daa fɔɔ wa shishiin mu Korente kulo li ni we

¹¹ Ayiwa, ne jo ba jumoyirine fɔɔ ne we. Ga yeeye pyaa ki ni lee ya foro. Yee p'a bi yaa yee p'a ne soni! Bani ali ne nehe bye ne ne yaaga be we, tudunmɔ mege wuu piimu yee wa jateni ge, wee wa ya ye ne na kaa la shishiin ni we. ¹² Can na, kapyegee kiimu k'a li shee na Kirisa wo tudunmɔ ne ne ge, kee beeri ya she yee na ni loxulo ni. Kee ya pye naha sheshere, ni kakanhɔnaa, ni sefere kagbɔhɔ. ¹³ Ne ta pye yee mu tuguro we. Ni lee ye be we, leke ne d'a pye egilizii pusamaa mu lee di ya pye yee mu-i we? Yi yafa na mu lee na!

¹⁴ Li wii, ne gbegele xɔ da se yee yiri na tɔɔnii taanri wuu ni. N'a da zhe bye yee mu tuguro le tɔɔnii le be ni we. Bani yi kehe yanmuyɔ be di wa zhaa we, fo yiyee pyaa kiiri. Nɔhɔpiire ya yaa na wari shaa na yeri pu sefee naha na we, ga sefee p'a yaa na wari shaa na yeri pu nagoo naha na. ¹⁵ L'a taan ne ni ne wu na kehe yanmuyɔ beeri kan yee wuu na, ali na naye be kan na fara wà. Ayiwa, yee kaa ba dan ne ni xuuni mu, lee l'a da ne pye ne kaa da da dan yee ni-i ge?

¹⁶ Yee na ba jo na ne pye tuguro yee wa shishiin jumɔ ni we. Nakaara wa lee ni we, ga pii na ba jo yee ni na shizhiinme ni ne yee co, na ne shiige shen.

17 Piimu nε tun she yee mu ge, nε kuduun sha yee ni wee wa keŋε kurogo ya? 18 Nε Tite ηεeri jo wu she yee yiri, na wù ceborona wu pinnε ni wu ni. Ta Tite ya yee ηmahana na kuduun sha yee ni? Ta nε ni wee wo kapyegee ki beeri ya pye mε nigin wε? Ta wèe naariganηaa ki beeri ya pye mε nigin wε?

Pɔli ya wu funŋɔ shaa ni kaa lemu ni ge

19 Na co fo taatuunnɔ na, yee wa giin na kajii wèe wa gaan wùye mu yee naha tàan, ga lee di be wε. Kirisa wo kariηεεge ki funŋɔ ni wèe wa yu mε Kile naha tàan. Wù taanηiinεε, yee wo n'a daa wu wo nahagbaashεεre kaa na wèe wa ye beeri yu yee mu. 20 Nε ba nɔ yee yiri, na funŋɔ wa di yi na ηagana lemu na wε, nε fyagi jo di ganha ba she yi na lee ηagana le na wε; yi be ganha bu na ηa ηagana la na yi be ya tiin ni lemu ni wε. Nε fyagi jo di ganha ba she yogo ta yi te ni wε, ni ηερεεn, ni loyire, ni beγanhara, ni mεkyεεgere, ni zɔjuuro, ni tabaara, ni kawuriye wε. 21 Nε fyagi jo di ba jo n'a nɔ yi yiri ge, Kile ganha bu da na shiige yi niηε ni wε. Sipyiηehemεε piimu p'a jurumu pye, p'i sanha daajεε jo pu cemɔhɔɔ ti na tapyege ni wε, ni pu dɔdɔɔɔ, ni pu kanɔhɔyɔ yi na-ε ge, di ganha bu da zhe ηεsinmε wo yee wuu na wε.

13

Fundogo jomɔ ni fò mujuu

1 Nε tɔɔnii taanri wuu l'a da bye le na she yee yiri. «Sipyii shuun taanri ya pye keree kiimu beeri fiin ge, w'à da zhe kee beeri naha shɔɔnri na be ni pee wo fiin pu ni.»* 2 Sipyii piimu p'a jurumu pye ge,

* 13:1 Dutεrenɔmε 19:15

n'a da yi jo waha pee ni sipyii pusamaa mu, ali na li ta na nime wo wa yi yiri we. Ne tee yi jo toro pu mu na shee shuun wuu li ni yee yiri. N'a da yi jo daha sanha pu mu jo ne ga ba she yi yiri, n'a da nuɔɔ peni nige kaa la shishiin na we. ³ Wee tuun wu ni, yi na ba li ce na Kirisa w'a yu ne ɔɔ na, bani kee kaɔɔ ki yi wa zhaa. Kirisa baraga ya ta ceɛ yee shizhaa na we, ga w'a wu sefeɛɛ ti shee yee niɛ ni. ⁴ Can wu ɔɛ wii, wu xuduun wu ni korikoritige ki na, w'a pye baraga baa, ga ɔɔ na wu ɔɛ nime Kile wo sefeɛɛ ti baraga ni. Na weɛ be yaha kariɔɛɛ ni ni wu ni, weɛ be baraga k'a xɔ. Ga Kile baraga ni, na weɛ yaha ni wu ni, weɛ na ba bye ɔɔ na yee shizhaa na.

⁵ Yi yiyɛ taanna wii, y'i yiyɛ suguri, yi bu da yi na ɔɛ n'a daa wu wo koo li ni. Ta yee ya li ce na yee funɔɔ ni Yesu Kirisa ɔɛ we? Fo yiyɛ pyaa bu she da y'a kuɔɔ n'a daa wu na de! ⁶ Ga ne da li na jo yee na ba li ce na jo weɛ ya ta kuɔɔ n'a daa wu na we. ⁷ Lee be na, weɛ wa Kile ɔɛri kɔnhɔ yi ganha ba kakuuyo pyi we. Lee kaɔɔ ɔɛ nago kanna weɛ di metanga ta we. Ga weɛ funɔɔ ki wa yi da kasaanɔɔ pyi, ali lee ɔɛɛ ba li shee be na weɛ p'a kuɔɔ metanga ki na. ⁸ Bani se wa weɛ ni weɛ pu pari can wu na we, ga can wu teɛɛ teɛɛ se wu ɔɛ weɛ ni. ⁹ Weɛ baraga bu xhɔ tuun wemu ni, a yee baraga di beɛ, lee l'a dan weɛ ni. Lemu weɛ ya ɔɛri Kile mu ge, lee li wa me nago yee wo n'a daa wu w'a se ɔɔ na fo wu ɔɔ bu she fa. ¹⁰ Lee wuu na ne we se me we tun yi mu na li ta ne ɔɛ yee yiri wa we, kɔnhɔ di ba ɔɔ wa tuun wemu ni, di ganha bu keree ki ɔɔ shɔɔri ni waha ni, na saha ni Kafɔɔ wo fanha ki ni we, w'a kemu kan na mu ge. Kee

fanha ki kakaan ɲuŋɔ ki ɲε kɔnhɔ yee di da se ɲaha na n'a daa wu ni, ki ya ta kan gyeegi kaa na we.

Jomɔ pu taxɔgɔ ni fò mujuu

¹¹ Ayiwa nimε na cebooloo, wù ɲε tuun wa ni. Yi funɲɔ taan! Yi da yiyε logoo wari y'a se ɲaha na! Yi da samɔhɔrɔ leni yiyε ni! Yi pye ni fungɔngɔ nigin ni! Naɲiɲε di bye yi tε ni! Lee bu bye, taanɲεεε ni ɲaɲiɲε fɔɔ Kile na bye ni yi ni.

¹² Y'a yiyε shaari ni taanɲεεε ni! Kile wo fεfεεε sipyii piimu pu ɲε naha ge, pee beeri ya yi shaari.

¹³ Wù Kafɔɔ Yesu Kirisa wo niimε we, ni Kile wo taanɲεεε ke ki pye ni yi ni. Y'i gori yaha Fεfεεε Munaa li wo kariɲεεε ki ni.

KARINĒĒGE NŌMĒE NIVONŌ
New Testament and Shorter Old Testament in
Senoufo, Mamara

copyright © 2014 Wycliffe Bible Translators, Inc.

Language: Mamara S noufo (S noufo, Mamara)

Translation by: Wycliffe Bible Translators

Contributor: Wycliffe Bible Translators, Inc.

  2014-08-10, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files dated 29 Jan 2022

85728ed7-78f8-58e8-8967-0e976c0c2423